

四庫全書

史部

欽定四庫全書

史部
廣西通志卷八十五

詳校官給事中臣鄧文泮

檢討臣德生覆勘

總校官進士臣朱 鈐

校對官編修臣盧 遂

謄錄監生臣王元愷

欽定四庫全書

廣西通志卷八十二

孝友

卓行附

愛敬之良因心而發油然而達於至順是以其政不嚴而治聖人因嚴因親教益專此粵西之民樸邀少文而孝子悌弟漢宋以還接踵相企率皆敦至性而無所緣假超卓於服勞奉養終事之常即或毀肌滅性道異中庸顧里閭之旌猶為嘉予所必

及者行非立名則教先風世誠尚之也若夫睦婣
任卹與孝友同稱六行苟知整躬利物而返淳革
薄於觀型胥有助焉然則興明發而篤友恭被諸
風俗溢乎紀載上以徵

聖天子孝治之隆而昭至德於靡涯書曰若有恒性惟
恒斯道達矣志孝友附卓行

漢

丁密字靖公岑溪人居貧餽贈一無所受耕而食

織而衣量腹度形惟力是視而事親備孝養之禮
遭父喪廬墓三年有雙鳧飛集墓旁小池見人馴
伏後喪母廬墓雙鳧復至南齊時范雲為刺史遣
使祭密及頓琦墓

縣志

頓琦字孝異蒼梧人居母喪哀毀幾滅性獨身負
土歷年成墳雜植松杉有飛鳧白鳩棲息隨琦去

留

縣志

五代

梁嵩平南人劉龔據有廣南建國稱漢乾亨四年
春置選部貢舉舉進士明經十數人如唐故事白
龍改元歲乙酉嵩舉進士第一歷官翰林學士因
母老乞歸作倚門望子賦以獻龔憐而許之賜賚
皆不受惟請蠲本郡丁賦從之郡人戴其德立祠

以祀

縣志

宋

朱道誠字信中全州人少失怙孝事其母俞俞故

多病道誠截髮延醫尋山採藥不憚勞苦屢以獲
瘳後居喪力營葬於景德寺左結廬墓側有瑞竹
冬筍之異景祐四年有司以狀聞詔賜絹十足米
一斛勅本州以時存問及卒郡守趙昕表其墓曰

朱孝子墓

州志

朱冕字德甫道誠子也元符中王鞏坐司馬光黨
謫全州冕與弟袞從之遊鞏嘗目之曰冕真純不
苟袞開夾有文黃庭堅南遷過湘贈以詩其為名

流器重如此後冕居喪廬墓亦以孝聞於朝至和
二年賜粟帛如父故事尋以恩授宣教郎子浩侍
母胡病頃刻不忍離左右誓不飲不葷不娶以禱
母壽自道誠以來祖孫父子累世以孝行稱考之

前史指不再屈

州志

蔣舉字時舉全州人少為諸生久在太學一日忽
辭其友黃無悔曰學者所以學為忠與孝也忠既
未立孝焉可忘我其歸矣無悔以歌送之及歸奉

親朝夕不離母喪廬墓產靈芝有司以狀聞詔賜

旌表

州志

梁詔貴縣人少孤事母盡色養以孝廉舉元豐中
任廣東提刑司幹官後遭母喪哀毀骨立既葬廬
於墓手蒔松柏鬱然成林芝草叢生甘露時降事
聞旌表蘇軾南遷遇詔一見投契詔有子三人咸

遣詣軾勉以力學署所讀書處曰薰風

潯州府志

蔣瑞可全州人秉性肫摯事親以孝聞父年六十

四患篤疾百藥罔效瑞可號哭不知所為乃密禱於天卦股作羹以進父病遂愈壽至九十三刺史

朱子恭建孝子坊并歌一章勒諸石

舊志

毛倫陽朔人少讀書有志節紹興間與弟汀俱以良家子從捕曹成有功得官倫事母至孝勉其弟以致身而已獨辭官養母及母死哀毀骨立每一慟血淚交下既葬執汀手曰吾弟勉之君恩不可負也二親已亡泉下闕定省吾將往事焉言訖而

卒閏四十九日神色不變

縣志

蔣一鳴全州人與弟一夔等六人皆有至性誼不私蓄友于輯睦白首無間言子孫遵守其教凡五

世無異爨郡守鄧均表其閭為文以勸後

舊志

唐德柄全州人以經術傳家與弟德銳德祥自相師友教諸子姪世不分爨每食必同席脫近行未至必待其還然後食郡守聞而歎曰此北魏楊椿故事也今再見於唐氏矣因顏其齋曰明經堂曰

和順州志

倪文舉全州人景定間以孝行聞父章甫病篤文舉割臂肉以和藥父遂瘥後母病亦如之鄉黨每指其癥痕以相風示郡守表其閭曰興行州志

明

李文選臨桂人早喪父事母莫氏候寒溫具甘旨起居飲食必得母歡心母或不樂則長跪問故婉詞以解必俟母解顏乃起尤篤愛其兄弟一門之

內和氣藹然洪武十八年以孝行旌

舊志

陳大本陽朔人事母孝母死未葬會鄰家失火倉卒不能遷火勢熏灼延及椽桷大本伏棺號慟妻

孥牽之不肯出天忽返風火竟滅

縣志

魯成者衛卒也生不讀書而有孝行父早歿獨與母相依定省晨昏未嘗一日離凡蔬果初熟必多方營購以進曰母老矣不知明年尚能嘗此否迨母亡成已踰五十哀痛躡踊屢絕復甦終三年哭

聲常徹晝夜聞者莫不感動

舊志

鄧敏象州人十歲喪父事母陳至孝母常患篤疾敏禱天願以身代號泣稽顙血流被面母病隨愈後居喪哀毀骨立及葬廬墓三年如一日有司匾其家曰思本堂洪武丁卯登賢書官禮部儀制司

主事

舊志

曾才魯鬱林人襁褓而孤母楊氏年甫十六孀居教育領洪武丙子鄉舉由新秦教諭擢授國子學

正未幾乞終養歸曲盡誠敬母卒號慟輒氣絕或
規諫奈何蹈滅性之譏才魯曰人皆有二天我獨
一天云胡不痛宣德間觀察使王凱旌表之祀鄉

賢州
志

施堯工天河邑庠生家素貧孝事父母雖不備甘
脆而先意承志能得其歡心父先亡母吳多病積
年沉痾堯工抑搔扶掖未嘗頃刻離晝夜飲泣目
不交睫醫云欲知差劇但嘗糞甜苦堯工遂陰取

嘗之味漸苦澀心乃喜已而病果愈壽踰七十至

今里人傳其事稱施孝子而不名

舊志

楊名字彥實橫州人力學能文領永樂甲午鄉薦性至孝少喪母每歲時祭奠陳設其母遺物悲泣不能已後遭父喪一慟幾絕既葬廬於墓旁終三年不離一夕有白龜出於廬次時人比之蔡邕馴

兔云

舊志

唐徽全州人幼有至性與弟伊修侃三人同居盈

縮與共衣服器皿悉貯於公橐中無一錢私蓄四

十餘年友愛如一日

舊志

梁霖興業人家貧力學為諸生祭酒母嘗病痢三年中羈虎子霖身自澣洒未嘗假手奴婢或謂之曰君欲效石建乎對曰此人子分內事何敢希蹤古人邀名後世耶後貢入太學歷官知巨津州清慎自持歸裝無一物邑人重之祀鄉賢

舊志

甘思忠字秉直蒼梧人性純篤孝事其母母卒營

葬將窆之夕有虎踰跚而來銜一豕委於穴以去

總兵毛銳親詣葬所視之嘆其為孝感云

縣志

余全藤縣人父玠為邑宰母李氏全弱冠籍諸生
有孝行峽寇鄭昂作亂劫掠至藤執全母去全傾
資追贖寇益索賄無厭全恐母終不能脫乃謂寇
曰家有藏金母慮我年少游冶不告其處縱母歸
當盡取以來以身為質賊信之久而不至詰其故
乃瞋目大叱曰咄我給汝耳吾家故廉吏安得有

藏金賊怒遂殺之時年二十藤人皆為之揮淚祀

鄉賢

縣志

王國象永福人性誠篤不輕言諾歷官八年卓有政績歸里以勤儉訓子姓事父怡顏順志年九十
五歲而卒子呂濱事父盡孝道年亦九十餘人以
為孝行之報云

舊志

唐儼字時望全州歲貢生父蔭知彬州以老乞歸
驟得危疾醫不能療時儼甫十二皇遽不知所出

忽攘臂拭淚曰此非藥石所能愈乃割股以進父
啜之瘥已而從兄宦於亳儼妻鄧氏留奉嫡母於
家嫡母蒙病篤鄧亦割股以療學使姚鏌廉其狀
遂拔儼食餽於庠後儼生母宋氏沒葬於金盆山
儼廬墓三年哭泣備禮州守顧璘慕而訪之賦詩
以贈題其山壁曰望母巖後州守章諍聞於朝榜
其門曰孝行雙美

舊志

實桂全州人世業農能孝事父母情文兼備有過

儒者父母嘗同時染疾桂沐浴禱天願以身代病
勢轉劇乃痛哭呼籲剝左臂肉密為羹以進父母
食之甘疾皆愈後母復病不起桂廬墓三年動合
禮則學使黃佐召見桂撲野一無所言乃集諸生
明倫堂用鼓樂迎桂至待以殊禮示風勵焉州志
毛錦臨桂人六歲喪父以不知祖母墓為恨每至
春秋墓祭時輒望空痛哭一日行山間恍若有物
前導趨逐之披草而卧碑見焉即其祖母墓也時

孟御史洋謫桂林教授聞其事以詩贈之

縣志

全存義字終之靈川人性端慤敦睦族黨內外無
間事父母尤謹初兄弟六人分析田產存義獨取
其瘠薄迨父卒父妾以遺腹生存德子母無倚存
義割已產以給之每朔望皆同堂聚食事有可否
絕無忤言鄉鄰或忿爭者往諭之無不解其孝友

感人有素云

縣志

莫秉倫陽朔人少潛心好學研窮經史已而歎曰

典冊所垂無非教以孝弟吾得其本矣辟舉皆不就曰秉倫母在堂身未可許人也及母歿哀毀不能起既葬終身廬墓瑞竹叢生凌冬出荀人咸異之

縣志

劉本臨桂人成化丙戌進士授刑部主事少時舉措必稟命父母每讞獄輒遲徊久之而後決曰得毋隣於刻而違親訓乎後廬墓感白蓮芝草之瑞有司聞于朝旌其門曰孝行張駿有比部劉孝子

歌

舊志

高雲厚字農隱宜山人。生而穎悟，能詩文，敦尚孝友。每侍父母疾，刻不離左右。兄弟感其勞苦，欲分任之，則曰：「罔極之恩，無分於衆，獨安得以兄弟故自諉乎？」父母年皆八十餘，雲厚孺慕，老而彌篤。郡

守給匾旌獎，卒祀鄉賢。

舊志

文旭字熹旦，鬱林人。宋信國公九世孫。弘治時，以歲薦授奉議衛經歷。父早歿，事母至孝。母病，湯藥

必親嘗手滌溺器旦夕稽顙祝天願以身延母壽
母卒哀慟幾殞嘗訓其子曰人生出處兩端出則
事君以忠處則事親以孝吾家歷世相傳幸無墜
其家聲也嘉靖四年學使覈獎祀鄉賢

舊志

彭晟字子昇橫州人少失怙孝養其母朝夕侍側
弘治戊午舉於鄉授寧國訓導依違不忍就母曰
汝嫌官冷乎抑憚我老難遠出耳我當勉行以慰
汝意乃欣然就道奉養於官署出入必告母喪終

身哀慕後司李叙州以循卓稱

舊志

張拱辰富川人性純孝朝夕定省不少缺弘治辛酉舉鄉薦公車至衡陽心忽驚悸立返轡比至家父病已篤拱辰中夜飲泣欲割股父揣知其意諭之曰孟氏有云獸相食且人惡之世有割股療親者縱因此得愈以父食子陷親不義拱辰乃止逾年父歿哀毀不欲生服闋授交河教諭迎母就養會母疾拱辰籲天請代病愈遂疏以母老乞近地

得改授龍川尋陞汀州教授造士悉有成後以母

喪哀痛成疾歿於汀

舊志

龍時吟恭城人父日昇積善好施與人無忤父歿
居喪盡禮三年如一日母病劇顙天請代母遂甦
曰神以我子誠禱延壽一紀矣兄死姪尚幼以遺
產悉推與之凡賑饑救患必曰此吾父遺命也憲

司屢加旌賞謂有善則歸親之義

平樂府志

濮惟璋恭城人

一作平樂人

父邦德病竭力湯藥久不

痊乃割臂以進父病頓愈覺有異他肉怪而問之
璋匿不以告嗣後雖盛暑裏衣長不解恐父見之
傷心也父母俱年過八十璋亦七十餘而終有司

為建孝子坊

舊志

吳廷弼字蓋臣侍郎廷舉弟也弘治辛酉舉孝廉
少從廷舉學以節義相規及廷舉為廣東副使坐
劾中貴人語侵劉瑾被逮廷弼聞之追及嶺階至
京廷舉既下錦衣獄禁勿通飲食廷弼著舉人衣

冠攜蔬飯泣詣獄門飲食之瑾矯詔枷廷舉吏部
前廷弼日操飯飯廷舉夜則卧其下如是者九日
刑部主事宿進見而憤甚即上書白廷舉冤冢宰
張綵以為言瑾乃釋枷論戍雁門廷弼負廷舉詣
都督府領戍牒汗與淚交墮見者莫不感嘆廷舉
示以詩有顛危九死過蘇軾患難相扶賴子由之
句後廷弼會試卒於道梁景行為撰友于傳以紀

其事

梧州府志

陳志堯桂平人母病篤醫藥弗效志堯破指血作書告天願以身代情詞懇摯書至累幅十指悉破壞母病尋愈事聞旌表

舊志

黃聚字朝會藤縣人弘治進士歷官大理評事寺正性廉慎讞獄明允純孝之行信於族黨親疾嘗便溺侍奉無不至居喪廬墓哀泣盡禮歿祀鄉賢

縣志

唐應禮全州人善事親言動不苟每日昏定後讀

孝經曲禮讀已默坐自省苟有微憾終夜不寐州

守顏其門曰孝著湘源州

志

陳正孔全州人母唐氏病醫者謂需人乳和藥以
血氣相感乃得效正孔曰血氣相感莫親於子矣
何藉他人乳遂剗臂肉寸許滴血投藥母果飲而
愈學使旌其門曰竭力盡孝每直指按粵必賜粟

帛以褒之

州志

岑孝子失其名貴縣人家赤貧傭力鄰家以其直

養親日必三省親歿棺衾無辦鄉人助費以殮孝子迭為傭力計費而償既葬每日至墓前稽顙哭

有司聞其事月給米旌表其門

縣志

陳九鼎容縣人父璋任光祿監事病亟思肉汁九鼎割左股作羹以進終夜稽顙禱於天顙破血流被面數日父果愈直指廉知其狀特旌獎之

舊志

莫駿平樂人少為諸生時徭賊焚掠其村母齊氏遇害駿誓以必報請兵於軍門挺身先入俘其酋

以獻兄有遺孤撫若己子後以正德丙子舉孝廉
歷官南京戶部員外郎歷仕二十餘年廉介如一

日乞休歸囊無長物

平樂府志

宋淳字顯卿宜山人慶遠衛百戶宋忠後也性謙
謹重然諾母李早喪事父鑑及繼母陳敬愛備至
少習儒已乃棄去業賈以贍家衆於是兄清弟澍
乃得潛心讀書應試入仕皆淳資之及後遭兩喪
淳皆獨任營葬未嘗責助於昆季其葬父也歲值

大祲寇亂交作又久雨連月不止淳齋沐旦夕號
泣禱於天至期大霽鄉人感其誠皆戈甲以衛先
後郡守咸敬禮之

舊志

黎艮字以時蒼梧人正德庚午與兄震同舉於鄉
任龍溪令兄司訓翁源夫婦皆卒官署遺子女各
二咸在齠髻艮撫育備至比長為之婚嫁過於所
生弟兌亦癸酉舉人為徐聞令罷官歸貧甚艮惟
竹屋數椽割以居之兌夫婦亦相繼卒艮皆殯葬

如禮良明敏好學以書籍自娛不問家人生產卒
之日幾不能殮鄉人咸重之

縣志

蘇美義寧庠生志行醇篤侍母病湯藥非親嘗不
敢進中夜露禱願以身代及母歿哀痛骨立既葬
廬於墓所每攀樹號哭烏雀輒羣聚叫噪期年竟

以憂死人謂之死孝云

舊志

梁寶永福人少孤專精力學事母惟謹母病篤醫
不能治寶割股和藥以進母遂愈嘉靖間御史榜

其門曰篤孝後其子旦亦割股以療母御史重榜
其門曰世篤孝行

舊志

文潛字時顯鬱林人文旭子也少稟父訓以修身
力學為務事親盡愛敬雖暑月必冠服侍側家庭
之中嚴若朝典及遭兩喪咸廬墓三年士類推為
篤孝嘉靖四年學使重其名給以冠帶

州志

何埕崇善人工文章敦孝弟少遊上庠為諸生領
袖嘉靖初詔天下選拔鄉貢埕赴省就試前一夕

得家信知父疾即踉蹌歸省父病漸劇埋衣不解帶者數月迨居喪號哭徹晝夜鄰人為之罷餐有

司以聞詔加旌獎

太平府志

彭述恭城人少有文譽以選貢入太學早喪父事母至孝朔望必齋沐焚香望空拜禱同舍生尾而聽之則備陳母苦節願減祿算以益母壽乃交推重之及母歿三年不御酒肉哀至輒慟絕性好施舍田租所入必分給親族嘉靖間部使監司並加

旌獎

舊志

謝汝言全州人父早歿哀毀骨立廬墓三年事母
蔣氏備盡色養朝夕在左右母病藥弗效汝言引
刀割股手顫不能絕乃齒啣而落之為糜以進母
遂愈嘉靖十二年州守林元旌其閭曰孝子第州志
李獻忠蒼梧人甫冠時父為文昌令卒於官獻忠
扶襯歸水漿不入口羸瘠幾不起既葬廬墓復承
祖母重旋又居母喪數年中疊遭大故哀毀如一

日永康程文德主嶺表書院聞其名招致之甚見
器重嘉靖間由選貢為茶陵丞以清慎著

縣志

文桂字仲芳鬱林人旭之孫潛之姪也少孤事母
梁氏極孝謹撫幼弟尤友愛嘉靖戊子舉於鄉後
居母喪泣血三年未嘗見齒祭葬一循古禮會值
大比黔省聘為同考試官卒於棘闈隆慶二年舉

祀鄉賢

州志

李資仁李資深俱宜山人家貧力學兄弟互為師

友誦讀之暇相對織屨以奉母嘉靖丁酉同舉於鄉皆由教職擢縣令又同在閩省相去僅數百里迎養母氏歲三四往來時入榮之居官咸砥礪名

節以廉潔相高

舊志

關鎮南字午林鬱林人幼有至性事親能先意承志嘉靖間由明經為新會縣佐惠愛有實政值歲饑捐俸賑濟多所全活旋以母老乞終養周旋膝下備盡服勤之道居喪廬於墓側哭必嘔血竟以

憂卒崇禎五年祀鄉賢

州志

黎琳藤縣人天性謹厚尤以孝弟為本母病綿延
三載琳朝夕侍床第未嘗一刻離推遺產以讓兄
兄死復育其孤姪嘉靖初由歲薦歷官兩淮鹽運
使廉潔自矢任六載歸不減寒素有負郭田數頃

歲入輒以分恤族黨士林益稱其賢

舊志

陳乾字健之藤縣人天姿穎異十歲通詩書能文
章母病疽躬自拂拭毒久不得淨日以口吮之父

所遺產悉推與諸弟嘉靖辛卯領鄉書任通山知

縣清慎自矢後以病歸

舊志

胡清恭城人為儒掾省察以母王氏老不願謁選
母責之曰幸際昌時不仕無祿得為孝養乎清承
親旨勉強就道初授驛丞旋陞倉大使祿薄不得
迎養復乞休歸晨夕事母旁每食必致甘脆自膳
則藜藿不克副使上之於臺旌獎之

舊志

蔣廷祿全州人世家力農稟性朴實少喪母惟父

是依凡力所能為無不竭盡父歿結草廬於墓旁
人因其獨暮夜嘗作鬼聲遶廬而嘯或蒙虎皮跳
擲左右廷祿信以為實嘆曰我一身不足惜幸勿
驚先靈終不去先是其父病噎廷祿割股以愈已
而復病廷祿又將割股夜夢神告曰咽通於肺唯
肺可醫廷祿驚起即引刀剖腹以手探肺出截寸
許急熟以啗父父果愈而廷祿亦無恙嘉靖甲寅
馬平徐養正督學滇南道經其地為文以紀之題

其門曰至孝格天

國朝州守吳銓大書純孝以表其墓

舊志

周友用恭城人嘉靖間東寨寇暴劫殺其父相友用義不共戴天屢泣陳當事請兵勦殺不許遂流蕩于外求報讐幾二十年不變志上官憫其孝為

發兵平東寨邑賴以寧鄉人咸頌之

舊志

甘用世賓州人少孤事母甚孝登嘉靖己酉鄉薦授龍游令政多惠愛百姓比之杜母用世曰衆以

我為母抑知我固秉母教乎每晨起必冠服焚香
告天祈母壽畢然後視事母病請以身代即日乞
休歸養母歿哀毀嘔血不一月卒於苦塊鄉賢名

宦兩地崇祀之

舊志

王熙字元穆臨桂人少機警跌宕不羈既冠補博
士弟子乃折節向學事母敬謹無違晨昏必衣冠
定省有事則長跪以請兄素好飲博多敗檢熙每
飯必與兄同食兄脫不至雖夜分不獨食也兄感

之卒化於善

縣志

何世錦興業人初喪父哀毀過禮水漿不入者踰
七日母謂之曰我已抱未亡之痛汝更以孝死貽
我戚乎乃強起飲食後任南雄府照磨以母老乞
歸養定省不少缺有司以聞隆慶二年為建孝行

坊邑祀鄉賢

舊志

黎世臯永淳人孝事父母定省無失每出必限時
刻雖疾風甚雨不少違依依膝下終身如一日

縣志

陳性永淳邑庠生父早歿孝事其母未嘗少懈自
生養死葬及歲時祭奠必誠必敬悉準文公家禮

時人為之語曰孝行未盡羞見陳性

縣志

陳一簡永淳人少嘗刺股血和藥以療親鄉閭稱
其孝輒改容遜謝曰此出於不得已耳豈敢以是
為名乎聞者感之咸敦門內之行屢舉鄉賓壽八

十

舊志

韋一奇平南人隆慶時官教授事親奉養惟謹每

雞鳴必衣冠拱立牀下問父母安然後出後遭兩喪殯葬皆獨任曰古人云願為人兄供養之日長也今父母早世不克盡烏烏之私尚忍以此分任弱弟乎遺產悉給與諸弟其未受室者復為之婚

娶巡方學使屢嘉獎之

縣志

譚汝試字惟譽興業人以仲父貴早喪無子出為其後事繼母何氏孝謹何每哭汝試輒嗚咽不食何哀憐之飲泣不使見幼與從弟汝講同受學汝

講先舉鄉薦萬曆壬午乃與兄汝誠同舉於鄉後
丁母艱羸瘠殆不起已而歎曰母節未顯不可以
身殉乃陳情得旨旌表時人為作孝子傳

舊志

呂嗣簡字希夷臨桂人文簡長孫京兆長子也兒
時岐嶷不凡其學必本於孝弟曰孔門以德行為
先無徒以詩書取科第也父患痢嗣簡聞病可治
其糞必苦遂取嘗既病愈乃已後母病篤痛不能
終養發聲一慟嘔血升餘病瘵不起卒年五十二

祀鄉賢

縣志

葉汝鑰字淑準橫州人年十四補博士弟子試輒
高等萬厯乙卯登鄉薦以嫡母年老生母又善病
遂不與計偕日侍二母側備極色養咸得其歡心
歲大饑道殣相望汝鑰為粥以待饑者閱數月全
活甚多卒年四十人惜之祀鄉賢子澍登賢書官

兵部武庫司員外

舊志

晏景卿鬱林人領萬厯壬午鄉薦知青陽縣事尋

轉瓊州同知有惠政親病躬藥餌忘寢食兩目幾
失明念兄無子以次子嗣祭無田捐己產立之官
成後與總服之親共高曾者同居一畝之宅邑人

咸羨祀鄉賢

州志

劉學倫賀縣儒學生甘貧力學曲盡孝道父歿事
祖母繼母惟謹以舌耕為供養祖母嘗泣謂之曰
汝父先我死汝能朝夕在我側雖啜菽飲水吾所
樂也萬厯間舉順孫撫按旌其門學使者給以粟

帛 平樂府志

黎伯寬陸川人萬厯間以歲薦任西安主簿事親至孝能曲承親志及親歿三年廬墓每哀號攀樹

淚點所漬樹為之枯

梧州府志

曹正儒全州庠生父學程官侍御史萬厯朝建言封倭易儲諸大政忤旨論死正儒朝夕不離犴狴見父憔悴骨立嘔血仆地久之乃甦刺血三上章乞以身代不許後遣戍熹廟初叩闕訟父寬得贈

官賜祭崇禎五年特旨旌孝子

節州志

謝日昇號九如全州人萬曆己酉舉人仕至中憲大夫前為福州郡丞值海寇亂監軍嚴肅僉推其能俸入皆以均分兩弟太守王國相額其堂曰孝

友祀鄉賢

州志

王一卿昭平人增廣生動履謙和與人無忤父早歿每諱辰輒痛哭不食母善病一卿朝夕在側湯藥必嘗而後進偶讀詩至無父何怙無母何恃慨

然嘆曰幸有老母不能健飯而終日牀褥安能復事筆硯乎遂棄舉子業服勤自矢鄉閭稱為王孝

子學使獎其行旌曰孝敦百行之原

平樂府志

楊汝名永淳人父病日以舌舐之目疾復明父卒

廬墓三年由歲貢任陸川縣訓導歷荔浦教諭羅

定學正陞太平教授署邑篆饋遺常例盡革遠近

稱廉吏居母喪哀毀骨立兄弟子賴以造就周鄉

黨之急惟恐不贍萬厯末祀鄉賢

舊志

雷洪威荔浦人三歲而孤母黃氏幼勞鞠育備極艱辛洪威稍長聞母中夜紡織聲即痛哭自傷貧不能奉養也母病篤禱天割左臂作羹以進病果

愈

平樂府志

石若玉荔浦人少失恃保抱於繼母十歲父又歿若玉毀瘠備禮如成人以早喪親故終身哀慕事繼母曲盡孝道年五十三病革命其子曰堂有白髮不能終養死且目不瞑汝輩當善體我志無使

老人有喪子之痛言訖而歿

平樂府志

謝天命字魯生全州人天啟辛酉舉人事親孝旦暮飲食必躬奉侍與弟震命互相師友嘗謂讀書必以躬行實踐為本尤喜獎進後學掌教閩中諸生為之立祠歷官戶部清吏司郎中清慎自持陞龍安太守未任卒祀鄉賢

州志

晏然文鬱林人少以孝友聞天啟丁卯登賢書嘗事父疾目不交睫者累月涕淚過節幾至失明後

以喪母減性不能終三年毀瘁而卒

州志

張茂植字培林臨桂人天啟朝恩貢以繼母老不
謁選母病醫不能治茂植慨然歎曰為人子者不
可以不知醫因博研方書遂精岐黃術以藥濟人
沉疴立起及母歿服闋始出任高州教授後以子

貴贈承德郎

舊志

江一淳全州人守身事親至性醇謹父病一淳卜
醫不吉默禱於城隍之神歸引刀割臂肉和藥以

進父遂愈天啟時州守表其門

州志

李廷松荔浦人七歲喪父家無一椽僦鄰之倉底以居母莫氏目瞽廷松行乞以養稍長為人收牛每日必裹飯以奉母母死無以殮遂典身備棺祭葬頗如禮年七十餘每念及父母涕淚交墮鄉人

咸重之

舊志

劉光業橫州人家素貧養親不能備甘旨每視膳輒墮淚母莫氏病篤光業無所措割左股為粥飼

之母遂愈越三年又病光業禱於天斷左指滴血
投藥鑄中病復愈後母歿一慟幾不起以父在逾
七日乃稍進水漿事在崇禎十三年州人士請於

憲司給匾以獎

舊志

羅奇杰懷集邑庠生少孤事母至孝每雞鳴入省
必冠服立牀下長跪問安否而後退母善病奇杰
躬侍湯藥寢食俱忘凡浣衣滌器皆身親之母卒
年九十三奇杰號泣有逾孺慕廬墓三載未嘗一

日離前後憲司屢行嘉獎崇禎時直指李仲能表

其居曰孝行可風

梧州府志

李舒清義寧人自其先名志聚者至舒清凡五世

子姓三十餘人皆同居合爨式好無間家貧以耕

漁為業所得錢穀悉家長主之先完公賦後克家

用內外長幼不私蓄一錢有司題其居曰義門

舊志

李弟上林人年十四隨父出行路遇盜圍殺其父

弟奮不顧身奪刀連殺三賊力盡被害縣令憫其

孝聞於臺巽其門曰孝勇之門

舊志

國朝

張宗璠字瑞之恭城庠生事親以孝聞父病嘗糞
及父歿停柩在堂值偽逆兵至鄉人逃匿宗璠守
喪不去兵欲毀棺以身蔽之刀刃交加幾死不避
逆兵亦為感動棺得全康熙二十年士民公舉表

揚其閭

平樂府志

楊嗣秉鬱林廩生性最孝其父早喪母周氏心痛

咳血因廢舉業而攻醫賣田園以供湯藥侍奉承
歡不離左右十七載周氏得以壽終嗣秉泣血三

年學使陸祚蕃旌其閭

州志

歐日榮字樂崖平樂人幼失父兄家貲盡為無賴
子所奪及長貧甚母死不能厚葬每過墓哀號不
忍去雖當燕會一念及親輒復流涕撫其幼弟倍

至嘗著勉學三十餘則以垂家訓

舊志

孟應元恭城人家貧母病割股以救母病獲痊康

熙二十一年學使王旌以匾曰孝本性成

舊志

覃石長懷集人康熙己未歲虎噬人至數百其母
賓氏亦為所攫石長奮擊虎虎棄去復回顧石長

蔽以身母子遂得全

梧州府志

朱子慶蒼梧人郡庠生母司氏病狂醫藥罔效子
慶割股以救母病獲痊後以壽終巡按田總制于
有奇孝回天敦本立誠之獎

舊志

何昌儒灌陽人力圃供甘旨父應智患足疾經年

不瘳幾就斃昌儒籲於天一夕夢神示以膚血調藥可治既覺即潛割其左臂和藥傅之少止遂三割臂以治不旬日而父患竟愈族鄰欲舉於官昌儒固止曰虧體療親疾愚計也敢藉以沽名乎

縣志

李維藩字介人博白人幼穎異閱經書過目不忘年十四補弟子員既冠喪父家甚貧躬耕以奉母阮同母弟五人分甘共食互相師友康熙丙午維藩以春秋魁鄉薦力行仁讓訓宗族子弟有貧寒

者收恤之縣志

麥士奇崇善人領康熙己酉鄉舉性至孝家貧親
老以舌耕供甘旨時狼兵蹂躪合境皆逃士奇母
老不能行乃躬負母夜走四十里入那寅山中以
避母亡哀毀骨立生平好讀書博學洽聞尚秦漢
古文詞性理諸書設教三十年遊其門者多名雋
死之日不能殮門人殯葬之

太平府志

劉懋藻全州人性孝友事親色養備至明末遭亂

田園荒蕪舌耕以供菽水親歿哀毀骨立飭粥三
年兄弟翁和藹然一室兄卒後遺產悉畀諸姪與
人交然諾不苟康熙己酉領鄉薦初任河南光山
令有善政擢監察御史旋轉江南漕運使

舊志

梁敦峻字也千全州人七齡失怙事母盡子職稍
長發憤讀書下帷之所距家數里每日必歸省母
病侍湯藥廢寢食壬子登賢書未幾值吳逆變偽
黨慕名相招敦峻奉母遠避深山後為延長令恐

道遠不能迎養欲棄官友人以恩封勸乃勉之任
繼邀覃恩即請歸養晨昏奉侍未嘗一夕宿於外
十餘年如一日母年九十三以壽終敦峻年亦六
十九矣注目痛哭三晝夜不絕聲母既歿旋亦卒

州志

曾一懋臨桂人八歲喪父獨與母俱家故貧母以
鍼黹作生計為鍼傷一懋輒流涕性純孝娶婦後
益先意以承兼能刑及妻子歲辛未母病河魚汚

衣裳命其子週壽澣濯誤溺於水家人奔告一懋
持刃止之曰母病方劇一聞必痛絕子可再生母
難再得倘有不測當自刎以殉密遣戚友殮之已
而病瘥呼週壽以遠地讀書為辭母固問其妻含
淚而避終母身竟未及知生平未嘗疾言遽色或
以非理干置不校其母姨老而孀居無子媳迎養
於家事如己母鄉黨有稱貸者必竭力周之年七
十有六乃卒雍正八年

恩准建坊表其間

王泰斌臨桂人性孝友務農力學家業以興年二十一娶韓女為室韓善事舅姑和於妯娌泰斌雅敬重之甫六載以疾卒子二俱在襁褓泰斌誓不再娶父母及外父母勸慰續娶而泰斌堅執不從外父母歿為之殯葬悉盡禮盡情凡推恩加惠三黨必有次第又能敬士尊賢延名師以課子姪昆弟三人子姪男女計五十餘口四世合爨從無間

言年七十有四而卒姪宗羲癸卯舉人臨桂庠生
治坤乃其嫡孫也

廣西通志卷八十二

欽定四庫全書

廣西通志卷八十三

卓行

宋

唐叟字元老臨桂人孤貧力學以授徒養母年四十餘不娶紹聖間以經明行修舉為海康令蘇軾南遷遇叟握手如舊相識歎曰元老制行雖高唐氏豈容無後力勉之娶時叟已年五十矣旋擢通

判池州遂歸舊隱鄒浩亦與叟相契其謫昭也訪

於其家贈詩甚多

縣志

蔣堯佐灌陽人世以力田為業累積至素封性喜
施與里有吉凶不舉者必厚贈之嘗語人曰向聞
馬伏波云凡殖貨財貴其能散也否則守錢虜耳
吾力雖不逮心竊慕焉嘉定十六年大饑堯佐出
粟賑濟五日一發廩自二月朔始至七月稻熟乃
已賴以存活者甚眾安撫待制真德秀命於所居

立施惠坊以旌之

縣志

陶濬平樂人建隆初由國子生官奉直大夫致仕歸立興教院以陶淑其鄉之俊秀建家廟立義田課諸子姪以讀書修業承先裕後各有條理當世

奉為準則

平樂府志

蔣公頤字生父全州人桃源令公順弟也少從兄受業勇於為義其意氣激發奮不顧身開禧間寇盜蜂起公頤散家財集鄉勇朝夕團練殲厥渠魁

一境晏然其功為多

粵西通載

蔣志灌湯人赴義慷慨有請必應歲凶出粟二百

石助賑有司為記諸石

縣志

元

唐天保鄧貴黃世榮俱全州人至正八年邑遭兵

燹城郭頽壞儒學大成殿戟門皆燬十年總管石

亨祖捐俸天保助材木修殿貴樹戟門世榮繕完

城郭人民保聚文教復興三人與有力焉

州志

明

韋昭字通顯宜山人永樂辛丑進士由翰林歷官大理寺副致仕歸隱居南山躬耕自給有司或造門請謁則荷蓑戴笠自田間跣足而至洗濯易衣冠乃揖客間出雞黍相款清談竟日絕口不及世事人益以此重之

舊志

楊璉臨桂人登永樂癸卯鄉薦歷官戶部員外郎年逾五十即引疾歸里蕭然一室常不能舉炊或

勸之官璉歎曰古人為貧而仕吾親已不逮若為

子孫計心竊恥之乃以卜自給終其身

縣志

高貴字龍谿宜山人父林洪武時屢有戰功悉推讓其舅彭舉舉得授指揮族黨義之貴能肖其父尤以利濟為心每值歲旱輒齋沐焚香跪禱烈日下見者咸笑之道遇遺骸必擇地以葬嘗遊那地州至喇峽口見病者偃卧路側汲水灌之且昇至寓邸作薄粥以飼良久始甦詢其里居姓氏曰我

撫州人陳賢偕叔諒行賈於此不幸罹疾叔夜負
我棄此而歸貴惻然為注意療治數月獲痊乃給
貲助之歸比抵家田宅已悉為叔據訟於官得還
遺書謝云吾母子再相見公之賜也願公後益昌
後果以子高官太僕封中憲大夫

舊志

蔣孔昇滕淵鄧烈俱全州人以氣誼相高見義必
為成化八年大饑三人各出粟一百五十石以賑
而其家遂無一月之積有司義之勒石以獎

州志

陳廣惠宜山人樂善好施嘗行南山見索金於路
守之至暮負歸坐南門見一人踉蹌涕泣而來曰
吾本邑里正奉令領解編銀五百兩赴省緣渴覓
水悞遺道旁一門死生實係於此廣惠曰吾為子
守之久矣舉而還之又歲荒捐金於六門賑粥守
令交上其事賜以五品冠帶後子策舉孝廉司理
建昌孫學夔學益皆登第顯官人以為積善之報

云

舊志

秦顯字孔昭象州人景泰間以歲貢為南平丞時
閩寇鄧茂七作亂顯率兵破賊城賴以全而身冒
鋒鏑幾斃流矢遂棄職歸食貧居淡不干有司日
持釣竿坐河濱得小魚數尾沽酒自樂人稱為釣

叟

州志

陳萬忠昭平人性朴誠好施與歲或不登輒慨然
歎曰際此凶饑人皆不得謀饘粥骨肉且離散我
寧忍獨飽乎乃出家貲徧周族里人咸德之三舉

鄉飲大賓

平樂府志

蒙瑛藤縣人家赤貧炊煙常不舉廉潔自守纖介不屑受於人有從子自服毒草將以傾人之家被誣者暮夜懷金詣瑛求脫訟瑛力却不受而潛解之事既寢人無知者

梧州府志

蔣朝暘平樂蔣璣之孫也璣討賊被害廕一子入監朝暘辭官廕就青衿端方勵行家貧餼食泊如或有謂其謁當道稍可療貧輒感然曰爾欲我為

涸轍之鮒中道而呼以升斗水求活耶下帷苦學
領鄉薦歷官至烏撒二守歸家無餘貲人過其門

指曰此真清白吏家也

平樂府志

趙希尹字樂耕全州人家饒於財以周恤為事嘗
效范仲淹置義田以贍族又置學田以資學者會
歲凶出粟賑濟全活甚眾仍捐田千畝為備荒計
州守上其事獎異之鄉里或婚葬不舉捐索以贈
有忿爭者輒為勸解一故人為郡守希尹偶經其

治贈以金辭不受固請則曰我當以推廣君惠乃
悉出以周貧乏不畱一錢嘗載米數千斛出糶經
湖南值彼地饑甚盡舉以賑空舟而返次子孟豪
登嘉靖丙辰進士歷官嶺西滇黔僉憲孫一鶴一
鵠聯舉孝廉希尹皆及見之人以為福報不爽云

州志

唐秦全州人成化甲午舉人判欽臺道三州嘗疏
六事言馬政得失皆可行妻死不再娶出其產一

第三子四分之州

志

張錦永福人性耿介絲毫不妄取而已獨好施鄉人貧不能婚葬者輒資助之後居官深得民心子

沛溢俱仕宦有名

縣志

李廷鸞蒼梧人以節俠自好不為利害所動巡檢周昇上海人也與妻皆沒於官子及婦亦相繼死僅遺孤孫長壽廷鸞憫之先是昇存日與同官唐子高周壁共籍所蓄二百金寄廷鸞家忽被賊廷

鸞妹京娘為賊所殺廷鸞哭妹畢即檢視所寄金
金尚在趨以告唐周曰幸不負託遂移長壽至家
撫育而翼成之閱數年僉事袁凱亦上海人聞其
事召長壽細詢其狀因以禮延廷鸞執爵而謝曰
君於周猶秦越人之肥瘠也而氣誼若此矧同桑
梓者乎吾有女甥當以妻長壽君弗慮周氏無種
矣仍禮送還其家

梧州府志

舒綱字朝舉以先世戍南丹遂為賓州人弘治間

舉鄉薦計偕北上友人以金為託路遇盜貲裝畧
盡惟存所託金比至都悉出以歸友友訝之曰聞
君被賊金何得存綱笑曰盜意良厚使綱不負所
託後授永州司訓永人素尚鬼綱請於上憲盡毀
淫祠舊俗為之一變秩滿遷海陽教諭

舊志

甘振字大聲桂平人幼以孝聞弘治九年進士為
南京戶部主事歷員外郎清慎自持尚書而下交
譽之使住揚州監收船料適貴人過揚有所干請

振正色語之曰此國法也君不可干吾聽且連坐
矣其人喞然去振遂移疾自免尚書訝之振對曰
家有老母不能遠涉顧日趣振就官不得不赴儻
幸苟全猶缺侍養一挂罪網將置母何地語訖泣
數行下尚書知不可奪聽之去道中聞母卒伏號
幾絕久乃甦服滿不復仕屏居白石山學者執經
就講及移渡南就講者益衆

涿州府志

容傳芳陽朔人嚴謹自守不妄交接慎言動睦族

黨教子孫以禮法雖盛暑必冠帶一門之內男女長幼秩然而辨雍然而和時比之石奮以子森貴

封文林郎

縣志

廖綵字沙莊陽朔人操履端嚴動有禮則正德初補博士弟子試輒冠軍忽謝去有女姪適恭城儲積以暴病死無賴子欲因以構訟積懼將賣厚貲以賂綵聞力拒之鄰人李姓者假其名挾貲而歸綵亦不問家赤貧每杜門謝客以訓課為業及

子東升為別駕迎養於任雖貴服食不異寒素卒

年七十有七

縣志

霍榮字時秀藤縣人弱冠時父為議婚已聘而婦
雙瞽婦家以廢疾求退榮曰我以瞽退女將安歸
卒娶之正德二年以鄉薦任陽江尹多惠民歌
頌之凡其所行皆崇尚根本而謙冲接物藹然坐
人春風中後進從之遊咸被其陶淑卒祀鄉賢

舊志

任良幹字直夫桂林人嘉靖中登鄉薦授潛江教

諭有鄆人劉姓者為巴縣簿其妻弟王邦相攜幼子六兒來訪之劉拒不納旋亦失官歸邦相以病劇哀乞附船尾簿恚之至潛江推而棄諸路邦相卧不起六兒行乞至學舍良幹見其狀不類乞者詢之得其故乃親詣邦相卧處致醫藥餽粥及卒為治後事收養六兒教之以書劉簿既歸邦相妻詢其夫若子不得疑見殺訟之官獄久不決翰林王九思邦相族人也其子為順天通判良幹令六

兒寓書通判以掌印書尾書至而通判已卒亡何
喪歸九思檢其篋得六兒掌印書因出以示或疑
其偽邦相妻泣曰吾兒指缺此當是也使次子持
金至潛江取六兒時良幹已行取赴闕瀕行預誠
家人若鄴人來取子毋留一錢至則却其餽謝厚
遣之而劉簿之獄解良幹後為申陽州牧更以循

卓稱

舊志

李德經義寧人嘉靖二年山賊暴橫肆掠遠近男

婦德經亦在擄中見村婦被擄不勝憤激乃力奪賊刃連斫數賊即自刎而死鄉人義之

舊志

林應高字虛衷懷集人以選貢授龍溪丞守正不阿為上官所敬憚罷官歸躬治園圃以種植自娛鄰人有盜其果蔬者輒避不出妻孥問姓名亦不

答其厚德類如此

梧州府志

梁龍興業人家貧好學以澹泊自鳴早歲食餼領鄉貢不赴廷試未三十喪偶或有議婚者輒拒之

曰吾聞楊叔節有三不惑見稱於漢史彼豈異人哉遂不復娶年九十八猶手不釋卷敦行益謹有

司特加敬禮餽以金帛悉不受

舊志

湯自強馬平人萬厯戊子鄉薦會試得副榜令南川與李化龍劉綎同平播州推官高折枝爭其功遂致仕歸里戊午己未歲大荒自強捐貲賑濟復為告糴於衡永全活甚多守道周起元以其事聞

奉旨賜匾兩舉鄉飲大賓

舊志

蒙普貴縣人由貢生官五軍都督府經歷陞鶴慶知府以廉介稱幼年侵晨出河下拾遺金持歸復至其處候失金者有商悲號而至勘其數相符引歸付之商以半謝不受居官廉潔其賦性云縣志

潘明臣容縣庠生以孝行稱肆力於學書策之外

淡然無所好有五子各授一經後子日新官潮陽

郡丞孫肇科復登鄉薦

梧州志

梁雍柳城人領萬歷壬午鄉薦歷任廣通宜城耒

陽令皆有政聲乞休歸值戊午歲饑雍悉出家貲
糴粟賑濟又疫癘傳染復為辦藥遍歷病者之家

給之全活甚衆邑人請祀鄉賢宜城祀名宦

節舊志

廖九成字念隴全州人幼孤輟學年二十六謁其
舅於官署復理故業不數月而學成後更屏絕人
事專精文藝生三子親督課之庭訓嚴肅口講手

畫悉本唐宋大家三子皆早有聲譽

州志

楊義臨桂人性仁厚家素貧僕賣酒以供餽粥崔

某者靈川人也通官儲三百金繫於獄家人鬻產將以金輸官過飲醉遺金去僕喜持告義義立使追之弗及翌日遺金者至義即舉而歸之遺金者欲分半以謝不受崔以金輸官乃得脫日叩天頌

德後義子孫相繼登科

縣志

林翔鳳崇善人慷慨好施雖傾產不顧為諸生時里人有自鬻以葬其親者即奉所得脩金代贖萬歷舉於鄉授永平司理決獄多所平反察劾不憚

權要嘗贊畫軍前屢立奇績欽賜蟒玉及歸門第

卑隘無異孝廉時人益重其操

太平府志

莫自棄永淳人少謹繩尺不隨時俯仰鄉閭有爭

訟者輒曉譬曲直各無怨言又常為人排難解紛

人咸德之有司重其行四舉鄉飲

舊志

莫屈賢永淳人家貧力學食餼於庠制行端方文

尚醇雅雖饗殮不給而歌誦常有金石聲士林奉

為楷模

節舊志

張子麟永淳人勵志廉隅率履不越居鄉以平恕

率物藹然如春風與父言慈與子言孝里黨被其

陶淑漸歸於淳學使兩加旌獎

縣志

黃扶寬永安人家業素饒勤敏好學年二十二喪

妻里中富人欲以女妻之誓不娶邑人義之

舊志

龐希睿陸川人解元龐鼎次子也天啓間歲貢性

恬靜安貧力學嘗路拾遺金數十兩守之終日旋

密訪失金者而還之親喪三年廬墓孝思尤篤擊

馬 梧州府志

陳藻永淳人律身嚴整以禮法自持早歲食餽為學宮都講潛心著述足跡不入公門當事欲延致之託疾不見知縣李蒙古詳請旌獎

縣志

盧傲麟懷集人天啓辛酉副榜父早歿孝事其母母病躬侍湯藥衣不解帶者數月萬曆戊午歲大饑傲麟率鄉里入山告糴羣盜蜂至欲要奪之衆皆走傲麟以情告且諭以理盜曰善人也遂釋之

由是往來山中連月賑糴民得全活崇禎間以子

際奉官刑部員外郎封奉訓大夫

節縣志

鄧鑛字克柔宣化人早孤敦孝友尚恬淡母素多
病醫勿效遂潛心醫術既精母乃安或勸其應舉
鑛賦詩云野人耽得野人趣老大何曾懈讀書酌
酒吟詩緣底事耕田鑿井更何如未因紫氣騰霄
漢自有春風到草廬聖代於今又堯舜脚根隨處
可樵漁涉獵羣書吟咏自適與高人達士遊有半

村詩集

舊志

呂釗灌陽人好讀書與世無競愛止山壑然素負節氣慷慨能任事嘗讓地遷建文廟捐金為衆倡鳩工庀材獨身經理以告成功而以布衣終其身

縣志

韋人豪平南人幼而持重舉動必稟命父兄既長不妄交游惟閉門誦讀崇禎朝任教授擢都察院司務遇事從容辦理有法鄉邦推重以孝友廉靜

獎之節舊志

黃龍躍號惕菴全州人崇禎壬午舉鄉試第一居京邸值闖變執詣公所欲官之龍躍厲聲叱賊時降者滿座皆慙退賊不能屈得間行至南都上疏寓書於家人訣別曰天下事去矣我輩讀書何事遂不知所往妻蔣氏紡績苦操者三十二年撫子

女以節終州志

廖標字君知岑溪人崇禎壬午登賢書居親喪哀

毀骨立時盜賊羣起歲又苦饑標力請於官捐米
煮粥以賑鄰邑避兵者多投止其家歸則給以斗
米甚且解衣以贈有龐氏女亂兵自他邑掠至標
出貲贖歸令與已女同寢處旋送還其父母標患
賊蹂躪糾集義勇為團練計為亂弁所害邑人悼
之請祀鄉賢

縣志

王承聘昭平人少食餼膺歲貢遇事慷慨不避艱
險崇禎初撞人韋信等夥黨占民田若干頃民賦

無出咸訟於官官不能決信等且以所入租投獻
靖江藩勢益橫里民輸無田之稅者已八年流毒
日甚承聘挺身詣闕負斧鑕叩閭乃得給田還民
民咸被其福

舊志

國朝

歐陽榛字廷獻平樂人廩生嗜義若渴鄉人有逋
賦鬻其妻子者榛代贖之又捐金以助婚備棺以
恤死遇饑年竭力賑給傾貲不惜病篤時焚風逋

舊券而歿

平樂府志

李楷貴縣人安貧好學耿介自持友人龔七以金

五十寄之後遭兵燹悉還不苟

節縣志

甘受調平樂人家頗饒悉以與兄弟值甲寅之亂
晦跡徯山有邑人捧偽檄招之辭以親老亂平歸
築別業於桃竹山池傍名曰宛在從游者皆繞池
而舍父疾湯藥不假他手又清夜默禱乞以身代
里有貧而病者割館穀以助或又有告者曰某卒

幸為之殯受調曰不可吾殯之何以為若子孫地

其立心忠厚又如此

參府志

王之驥字龍友灌陽廩生性通敏邃心理學每試輒前茅尤敦孝友重氣節

國朝康熙十三年孫延齡叛之驥挈家避跡深山賦三峰煙雨以見志延齡慕其名迫令督餉之驥憤恨疾作行至城西堅卧不食而死所著有格致集

縣志

張爾修字遠塵蒼梧人父志以軍功得世襲指揮
僉事爾修天性至孝父早卒以力養母折節讀書
與諸文彥相切劘問學固窮不墮康熙十三年吳
三桂叛偽鎮蜂起其壻屢以鄉兵破賊賊恨之岑
溪陷爾修絕粒死藁葬邑人憐之舊志

嚴亨灌陽人為陰陽學訓術請築都江四十四堰
蓄水以資灌溉邑人德之縣志

李甲先字遜菴博白人好學能文以明經為武邑

教諭遷慶遠教授與同母兄甲芳事親俱以孝聞
甲芳先卒甲先視兄子如己子教之成名嘗以學
俸置義田給族之耕讀者終身敝衣蔬食淡如也
辛丑秋邑大饑乃取家財擇里中少壯人授一金
使告糴於鄰境老稚不能行作糜賑之不匝旬而
裹糧雲集炊煙四起鄉評善之年八十三卒

縣志

朱兆元臨桂人天性和平與物無競躬行儉樸而
能赴人之阨困子姓戚黨中有孤獨無告者為之

喪葬嫁娶不伐其德子宏華康熙癸酉舉於鄉任
河南沈邱知縣能得民以親老請告終養兆元以
子貴封如其官年九十七而終

縣志

李廷芬字蘭若國學生博白人性明敏能文章事
母孝先意承志數十年如一日喪葬盡分盡禮嘗
曰當此大事豈敢稍有缺憾身雖抱病而歡粥茹
蔬結廬墓側者三年親友見其哀毀骨立勸以少
節則悽然淚下嗚咽不自勝待宗族嚴正而聯以

恩情撫幼存孤延師訓教子弟因以列士林者十
餘人性尤樂善好施當康熙癸巳壬寅兩歲歉甚
罄所有以濟貧乏於城東設廠煮粥凡兩月餘饑
民四集賴以全活知縣程鑣載其事於邑志

舊志

朱履躍臨桂人性好學博極羣書循循孝弟不敢
越規矩受母命婚於同里王氏唱隨七載相敬如
賓旋遭鼓盆戚子亨謙尚幼執友每以續膠致辭
履躍曰人生婚配原為嗣續而然今履躍已有子

矣何以續為况巾幗女子尚能矢志讀聖賢書乃
為忘義人耶自是鰥居五十餘載生平一以敦行
為先母觀疾晝夜不寐焚香祝天願以身代母歿
後廬墓如禮其賙卹孤貧而居家以法御下以慈
閭黨奉為模準今庭桂傳芳有聲庠序人咸謂孝
義所致年逾古稀無疾而卒

盧兆鳴蒼梧人年十四遭父母喪貧甚不能舉乃
鬻身魚良汎兵楊洪為之感動給以資殯葬甫八

日旋遭兄喪洪復飲助之兆鳴乃為洪傭工汎所
晝夜不稍息會白馬山賊竊發兆鳴隨洪於營中
監軍蒼梧道陳公幾為賊所困兆鳴負以歸陳感
其恩入都挈之行與之婚娶居九載乃歸重修父
母及兄墓迎洪夫婦恩養於家親串之無力營葬
者凡六人皆殯巡撫傅公聞其名心器重之拔置
軍前遇征戰輒不辭難尋授撫標右營千總勤職
任兵民胥悅捐貲修文廟設義塾延師課讀歲癸

已饑出粟千餘以賑其他善行且指不勝屈年逾
八十無疾卒

廣西通志卷八十三

欽定四庫全書

廣西通志卷八十四

儒林

文苑附

通三才之謂儒儒非易言也蘊之為德行發之為
事業伊臯顏閔理一遇殊舉能恢廓乎儒之實者
也然道大而博不能徧觀盡識則得其性之所近
講學窮理固不失為儒者事而抽華擢秀澤躬爾
雅要亦見重於著作之林焉粵西自東漢而還通

經志古之士彬彬迭出才固未可以疆圉限獨可
以後先間乎我

聖朝治軼唐虞道崇洙泗文教盛而經術明涵濡蘊鬱
無不丕被服儒服而行儒行於以鼓吹休明有駕
陳曹諸人而上之者景行不遠庶幾旦暮遇哉志
儒林附文苑

漢

陳欽蒼梧廣信人少事黎陽賈護習左氏春秋與

劉歆同時而理解別出各自名家三輔決錄謂左氏遠在蒼梧蓋指欽也子元孫堅卿世習左氏春秋元既議立左氏學已而復廢堅卿能承先志殫

精卒業工文章有名當世

節梧
州志

宋

唐則字世範興安人少博學砥行舉進士歷官侍郎晚歸林泉築室授徒以身率後進橫經談道雖隆寒盛暑不少倦經傳皆為訓詁成一家言子叔

夏叔獻相繼登第

縣志

覃昌融縣人家世業儒祖父以官績顯昌澹泊寧靜閉門講學以求道為己任其文章風格峻整原本六經啟迪後進嘉祐六年登王俊民榜進士官至國子祭酒有文集行世

節舊志

何浚字巨源宜州人宣和七年貢赴辟雍上適幸學問春秋疑難浚博引三傳辨晰同異上稱善即

賜進士出身

節慶遠志

粟大用武宣人年九歲大中祥符間以兼通五經
應童子舉至都真宗親召問之奏對稱旨特補登

仕郎

舊志

王應辰興安人九歲能誦五經作春秋語孟義講
子史貢於禮部慶元四年赴國子監試中書省覆
試並通免文解三次從弟應申亦九歲能通九經
作周禮語孟義并語孟講說貢於禮部嘉泰元年
赴國子監試中書省覆試並通免文解三次

舊志

盧桐昭州人性朴誠不事雕飾以蔡挺薦至京授
國子直講高世邁俗謝絕交遊惟與孫莘老相友
善莘老嘗就桐講易悉發京房秘旨迥非時俗所

學大相歎服

平樂府志

蔣公順字成父清湘人少研精理學既而從鶴山
魏了翁遊所得益進歷七年辭去築室湘源顏曰
鷓寄鶴山發其義為之銘公順坐卧其中日以誦
讀為事後劉之傑制置兩淮公順應辟以解安豐

圍補官監施州清江稅尋授桃源令未任而卒

粵西

通載

元

王念九容縣人博學多通尤精易理至元間以明經舉例就近銓注授本州同知操持廉介見元祚

寢衰引疾棄職時謂念九進退得宜一身是易

舊志

唐朝字用大興安人刻志厲學有幹濟才試鄂省不利攜書及遊西湖從西疇劉先生請益丁亥選

授辰溪教諭時湖湘道阻舊立鹽鈔法官民交病
朝條救弊之策上大府不用遂歸授徒家塾一以
濂洛關閩為宗且以學貴存心乃剖析其義為心
法纂圖使學者知所趨向又彙括小學作訓蒙詩
五十餘篇以為聖功所由始遠近學者翕然從之
時鄂省移桂行省平章遂舉朝領桂林路教事未
幾丁父憂終隱不復仕

舊志

鄧雲翔臨桂人生平好讀書敦守禮節以闢異端

衛正學為己任桂俗素尚鬼即士大夫家多延僧
道及巫師雲翔太息曰生則誦聖言以邀名死則
誦偽經以求福豈幽明有二道乎非其鬼而祭之
諂也吾惟知遵吾教而已病革誠家人毋妄禱葬
祭一準文公家禮焉

縣志

明

梁經北流人洪武甲子舉孝廉授東莞教諭性恬
淡不尚浮華閉戶窮經講求心性之學其訓課生

徒務以誠實為本教施所被士風為之一變

梧州府志

陳伯魁興業人洪武朝以經明行修舉授本縣訓導集生徒朝夕講解難詰不窮時有便便腹笥孝先再世之譽旋擢南海教諭卒於官著有五經訓

義至今猶傳

粵西通載

陳朴字處實全州人洪武初有陳南賓者應賢士聘侍經筵講洪範九疇太祖喜其詳辨御書天下會講書陳南賓八字於殿柱命相蜀獻王有古師

傅風卒賜祭葬朴乃其後也年十四入蜀省伯氏
民獻因見之於王王喜曰長史今有孫矣遂留侍
世子從師講學及歸事母有孝行郡守韓忠薦於
朝授閩縣尉以公事赴闕就應天鄉試中式旋丁
母喪不復仕湖湘之士多從之遊其學悉本於經
術尤以省身克己為務鄉黨化之無復忿爭者孫
琬瑤璵瑛琦皆有名

舊志

蔣調靈川人少孤貧與母相倚為命力耕奉養暇

即讀書根抵六經旁通子史永樂初奉檄修邑志
求博聞之士無敢應者鄉里咸舉調遂屬調裁定

紀載詳核有信史之稱

粵西通載

賈魯宜山人領永樂辛卯鄉薦初授崖州學正旋
轉瀘州教本蘇湖課士有法尤能矯正時俗力闢
浮屠訓子綱絢輩以經明行修為務世其家學舊志
鍾逢辰橫州人永樂間由明經授房縣訓導律身
整飭課士端嚴人謂其一笑一嘖具有師範學者

咸敬憚之

舊志

任信字宗懋別號夕惕橫州人精易象兼通春秋
正統戊午舉於鄉公車至京師以春秋就正於內
閣彭時大見稱賞戊辰試禮部中副榜除德慶州
訓導教習士子端嚴有法致仕歸一經課子有司
不得見其面所著夕惕齋詩集五卷臨終出以付
其子曰吾生平根柢盡見於此汝慎藏之後子穀
登進士能承先志剏厠以傳世

舊志

陳宣全州人孝廉朴之子也正統甲子領鄉薦任揚州教授以文行砥礪多士士咸有成居親喪三年廬墓著有禮經意旨續紹集等書

舊志

徐容藤縣人天順己卯舉孝廉司訓興寧慨然曰政教誕敷首先學校誰謂廣文為冷官散秩乎遂殫心造士以經術相摩厲士皆肅然從之服其有守教四子二孫先後登鄉薦卒祀鄉賢

舊志

陸堅橫州人天順己卯舉孝廉授蒲城教諭從中

州閩禹錫講性命之學得伊洛正傳纂輯性理近
思錄等書朝夕諷覽以檢身為事終身無遺行子
嘉鯉字汝龍傳家學舉弘治五年鄉薦累陞廣州
府教授誘子衿循循有規矩有弗率者雖貴介子
弟不少假嘗受撫按命諭後山賊數百人歸附賊
以賄謝嘉鯉卻之初進士霍韜弟有過嘉鯉執教
規必扑乃已韜始而疑既知其賢遂定交焉卒於
官囊無餘貲韜以詩哀之

州志

唐瑄字德潤陽朔人少勤敏好學工文章成化辛卯舉於鄉除四川都司經歷或謂之曰以君之才奈何任此散秩瑄曰民社之寄非吾所堪參軍官雖閑無簿書之擾猶不廢我詠歌於是益加博覽討論古今著有大學中庸直講詩經說意及怡情雜詠詞林切要闢諺錄等書

粵西通載

璩綸宜山人登成化戊子鄉薦授平樂教諭召諸生講習明倫堂終日不倦夜繼以燭每至三鼓乃

罷凡六經諸子皆經口授手畫由是文風大振累

歲科名相繼士林感其教化立祠以祀

慶遠府志

周琦字廷璽馬平人成化辛丑進士邃於問學嘗謂堯舜禹湯文武周公孔孟道之準的周程張朱道之羽翼不審視其羽翼安求準的因著東溪日談十八卷又著儒正篇論薛河東之學為心印濂洛神合洙泗益學於河南閻禹錫其所傳有自來矣成化間獐賊猖獗琦時為南京戶部員外土疏

指陳時弊時論避之同郡有簡弼者登弘治鄉舉

通判肇慶起居語默俱中程度同以道學稱

舊志

莫正懷集人弘治壬子登賢書授祁門教諭學識

茂敏有經濟才其教督諸生必期明體達用不屑

為章句儒尋丁外艱厥施未竟而歿人咸惜之

府志

呂景蒙字希正象州人舉弘治甲子孝廉歷官監

察御史以直言謫外任旋累擢至大理評事俱不

就時周琦簡弼皆柳郡先輩倡明理學景蒙互為

切劘其所論說粹然一出於正制府張岳重其望
有事於柳過象州造廬請見流連竟日而去表其
宅曰理學名儒所著有定性發蒙象郡學的二書

及柳州府志十六卷

舊志

李璧字白夫武緣人幼穎悟長益肆力於學弘治
乙卯舉於鄉慨然有經世之志從楓山章懋講學
金陵克然有得因顏其齋曰琢玉以誌磨切之意
謂儒者治身淑世必先禮樂而古今制作互異鮮

所折衷爰蒐輯三禮註疏詣太常考訂鐘律及鄉射冠婚儀節彙成一編為學者準的歷仕仁和蘭谿教諭旋擢知劍州當兵燹後悉意拊循以甦民困政教所被路不拾遺尤好與諸生討論經史為稽古之學嘉靖乙酉以戶部郎召赴闕卒於道所

著有名儒錄劍門新志樂譜諸書

節舊志

陳邦偁字宋卿全州人正德甲戌進士歷官祠部主客郎提督會同館時儉人胡士紳賄通閹監邦

偁具疏裁抑之遂落職歸里杜門講心性之學弟
邦修及後進有聲者皆出其門垂四十年不與聞
戶外事內外臺省疏薦凡二十上卒不起所著有
太極圖辨解率性編靜齋漫稿等集二十餘卷學

使殷武卿顏其堂曰正學清操卒祀鄉賢

粵西通載

張憲字志綱荔浦人正德十四年貢入太學歷官
安遠令以老致仕學精三禮言動交際咸具典儀
習俗為之一變啟迪後進邑人士多出其門

平樂府志

莫遺賢字賓廷平樂人

一作蒼梧人

少以孝聞遂精易

學嘉靖辛卯舉於鄉授武緣教諭日與諸生講求象數於吉凶消長尤致意焉擢上海令以母老不

赴

節舊志

尹尚賓

一作尚賢

臨桂人嘉靖丙午登賢書任臨高學

博性磊落有風概日校典籍手不釋卷其教士子

務以名節相勗時捐俸助貧生膏火後擢國子助

教

縣志

吳廷憲思思歲貢生萬厯間官博羅教諭每與士
子講論文藝必以六經子史探究其原本學者始
蒸蒸向古後致仕歸復教其家塾子孫拔科第者
相踵邑人追慕之祀鄉賢

舊志

張廷瑤字鳳齋懷集人萬厯辛巳選貢初任潯州
司訓轉天河教諭再轉辰州教授所至悉心造士
經其陶淑者文品皆煥然一新而踐履篤實首重
明倫風教流傳殊得崇本抑末之意

參縣志

張所蘊字壯猷恭城人性嗜古宗西銘之學初以
明經訓導靈川遷東安教諭再遷橫州教授兩入
薦剡例轉別駕時年四十七以祖母春秋高請歸
養晨昏定省垂二十年著圖南會心編闡明正學
置有祭義二田以祀先睦族優游林泉七舉鄉飲
里中慕其懿行舉祀鄉賢

舊志

曾以誠字惟豫蒼梧人性嚴毅讀書博涉講業不
倦萬歷歲薦授平樂府訓以造就人才為任選諸

生英俊者闢別館處之月分俸資其膏火程士先
德行後文藝講業課文寒暑不輟偶一生素無學
行歲試俸列優等白督學竟不准餼以是人知砥
礪五年遷象州學正造士一如平樂如袁鳴泰歐

國雋皆所首拔士後皆登堂致祭其感人如此

舊志

參府志

歐璉思恩人萬歷間膺歲貢除韶州教授才識通
敏殫精經學教育士子有人已兼成之益韶俗文

風漸盛至今猶沐其餘澤焉

舊志

表時亨懷集歲貢生任保昌訓導轉融縣教諭律身嚴飭足跡不履公門學古窮經以詩禮相授受

孫國祥登萬曆戊午鄉薦

恭府志

吳邦佐

舊志作邦柱

字殿卿上林人少有孝行為宗黨

所推弱冠有聲庠序間以選貢除萬載訓導轉保昌教諭念親老道遠遂乞休歸執親喪一秉家禮不用浮屠所著有尊孔錄專排斥二氏訓子孫以

敬恕謂持身接物無過於此即以此顏其堂

節舊志

張昌廕全州人尚書溱曾孫也髫年聰穎天啟辛

酉年十五舉於鄉官翰林庶吉士與金聲劉之綸

輩倡明理學以王陽明良知為宗所著立志辯志

諸篇盡發先儒秘鑰卒年僅二十人咸惜之

舊志

龐人統字三陽北流歲貢生事母至孝舉優行為

薦紳所推重安貧授徒其學以誠意正心為本明

末亂起避居波得里峩冠徐步賊黨皆稱為龐先

生無敢犯者

舊志

趙壘字國重崇善人賦性剛方行履端嚴由歲貢授桂林司訓以師道自持督學重之常念麗江喪祭過侈乃取考亭家禮酌以俗宜編次為書名曰喪禮儀節發梓以遺鄉閭鄉人翕然從之以終養

乞歸祀府學鄉賢

府志

蒙克悌字恭先別號柱流北流人少有文譽崇禎丁卯副榜性和雅多丰儀舉止冲容為邑人望閉

門息影講求周易潛見之理當事仰其風範每造門請見政有所興革必從而諮訪焉縣令尚國正

待以師禮舉鄉飲大賓卒年八十三

節府志

梁方圖懷集人年十六而孤廬墓三年哀毀骨立崇禎間以明經歷象左二州教諭轉平樂教授課士嚴肅提命不倦督學黃景明嘉獎之曰吾道在子矣粵俗惑於堪輿親喪累數十年不舉方圖力白上官刻期督葬一時營葬者以萬計人初怨之

已而兵亂所在焚燬乃始頌德焉又嘗兼攝太平
學篆俗尚火葬禁之不可乃刊家禮四訓約要以
勸諭舊俗遂化著有五經要旨忠孝廉節等傳卒

年八十四

縣志

國朝

曾士揚蒼梧人性聰穎過目不忘年十八舉於鄉
潛心程朱之學訓迪後進肅然有規矩雖燕居必
盛服端坐嘗謂欲學聖賢當先主敬隆冬酷暑手

不停披郡邑乘多其手輯

舊志

高翀字翼生慶遠人以貢生任廣東信宜知縣旋致政僑寓岑溪討論經籍取濂洛闢閩以來諸儒之說而聯貫之著為四書會解後學宗之

舊志

黃嗣憲字異度臨桂人性明敏潛心理學弱冠入郡庠每試輒前列邑士請業者先德行而後文藝順治己亥督學黃鼎以嗣憲文行兼優且食餼日久詳授懷集教諭邑當兵燹之餘人文凋敝嗣憲

為設條規殷勤訓課一時士習翕然丕變

縣志

謝明英字子十全州人生平以孝敬自矢言笑不苟好讀書經史百家靡不誦習學醇行方凡子弟及門者一經甄陶悉有規度康熙辛酉舉鄉薦第一授永康州學正陞柳州教授調思恩殫心課士無間寒暑於孝子節婦尤加意採訪請旌不遺餘力郡縣或以事委勘研究務得其情所至皆有聲

州志

文苑

唐

曹唐字堯賓臨桂人初為道士有詩名太和中舉進士累為諸府從事及仕諸幕頗多贈答其大小

游仙諸篇語尤清麗在三唐中又別裁一體焉

縣志

宋

王元字文元臨桂人樂道安貧苦吟風月妻黃氏亦有雅操元每中夜得句黃必先起燃燭具紙筆

俟脫稿擊節吟賞酌酒相勸後徧採幽勝終於長

沙

舊志

翁宏字大舉臨桂人性恬淡不樂仕進常寓居韶
賀間以咏歌寄意同時富川林楚才亦以詩名與

宏相伯仲

舊志

唐仁傑全州人少有才思尤工於詩嘗入金陵朝
士集於升元寺酒行仁傑賦登閣詩立談而成有
雲散便宜千里望日長斜占半城陰之句為時所

稱舊志

區革宜山人登慶元己未進士性僻耽吟咏落落

寡合黃庭堅謫居宜獨相友善歌詩贈答

舊志

張亞卿洛容人種學好文瀕老不衰郡守鮑安丘

奇其才以遺佚薦尋登鄭獬榜進士官至朝議郎

廉州通判同郡有王之才文筆與亞卿齊名慶歷

間登進士歷官工部侍郎

舊志

謝洪象州人與弟澤皆博學能文時稱二鳳宣和

間相繼出仕雅遊薦紳間以氣節自負南遷之客

多館於其家

舊志

石安民字惠叔臨桂人少穎銳不凡登紹興乙丑

進士為象州判官累決冤獄及分教廉藤二州士

皆有所興起晚知吉陽未赴而卒生平喜為詩初

以竒麗見推於同輩已乃復歸平淡二弟安行安

持皆與兄齊名人號為三石有文集行世

節錄志

張仲宇字德儀臨桂人紹興間以詞翰名於世與

同郡石安民相引重桂帥張栻張孝祥范成大咸

賓禮之所著有桂林盛事記

縣志

廖遼明全州人博學能文尤工樂府性磊落不羈
以氣節自負陳瓘折彥質先後南遷與遼明邂逅

相契稱其才品

舊志

張茂良臨桂人嗜古能文語氣超潔於宋末諸家
外卓然一體仕止潭州善儀主簿才高位詘識者

惜之

參縣志

謝士夔全州人少有詩名舉淳祐甲辰進士值賈
似道當國不樂仕退歸林泉修孝弟之行間攜一
小童負錦囊尋歷山水意有所得輒形為咏歌陶
然太和與人無忤且以隱德昌其後

舊志

元

熊天錫岑溪人博學多才文譽籍甚當宋淳實時
賈似道秉政天錫喟然曰非士君子行道之秋也
乃放浪山水以詩酒自樂迨至元時始出應試一

舉登進士第仕有政聲

縣志

陳國質興業人至正間舉經明行修除瑞金教諭旋擢太僕寺丞洪武定鼎金陵遂致仕潛心古學

自號節庵著有節菴集行世

舊志

明

蔣楫字濟之全州人博綜經籍尤長於詩而散失寡傳人寶惜之洪武初太守章復以學行薦於朝召赴京師歷官衛府紀善時興安唐朝與楫同被

召而朝力辭不仕人兩賢之

舊志

楊宗盛賓州人幼穎悟博聞強識作為詩文輒驚其長老洪武庚午舉於鄉肄業成均讀書晝夜不輟上聞其勤敏命學士宋訥試其藝稱善特授翰林院編修自是益加淬勵著名於時

舊志

陸蟾藤州鍾津人也負詩名好探攬名勝時往來楚越生平踪跡所至登臨憑弔之作皆宕逸有奇

氣

粵西通載

傅惟宗字肇本藤縣人幼英敏好學解縉謫交趾
過藤寓水月巖惟宗從而受業焉永樂癸卯舉孝
廉授茶陵訓導年二十四即棄職歸逍遙林居吟
咏自適與其弟惟慶友愛損篋相荅終身無間凡
族人不能婚嫁者咸資給之

參府志

秦謙靈川人少聰穎博涉多通宣德己酉領省解
而鄉里草木一時皆凋枯謙以其兆凶不欲仕已
乃為祿養授寶慶訓導誘迪庠士文行咸可觀及

丁外艱服闋不補探竒攬勝以詩酒終其身篇什

甚多後皆散逸世所傳誦者惟靈川八景焉

粵西通載

毛麒修仁入天順庚辰進士性通敏博覽多識文

以古雅為宗不屑卑偶流俗居身謹飭以載籍自

娛為鄉里推重

舊志

陳欽桂平人穎悟夙成一目十行俱下嘗與里人

浴沒水得碑以手摩而識之登岸錄出不遺一字

詩文操筆立就具有漢唐風格天順己卯登賢書

未及見用而卒

粵西
通載

吳淵字希顏宜山人博學能文尤殫精於義理領
景泰癸酉省解司訓靈山已而引年歸以造就後
進為事經其指授者咸中法程遠近接踵而來皆

稱為吳門弟子云

粵西
通載

李崇貴縣人少好讀書家貧不能就學每往來鄉
塾輒徘徊竊聽久不去年二十八始得精心肄習
卓然名家成化己酉鄉試領解官襄陽甫仕而卒

舊志

李麟字成經陽朔人成化辛卯登賢書授應城令
愛民禮士邑化於絃歌致政歸以琴書自樂蕭然
高寄晚尤好讀易一經課子子壻秉訓義方敦行
孝弟正德間亦舉於鄉

粵西
通載

張策字獻可臨桂人正德丙子膺鄉薦任歸州學
正州當水道之衝常為民患策深懷憫惻轉武平
令尤寬厚得民邑有牛軛金雞二嶺最陡峻行人

病於登陟策命夾道樹青松經年而茂往來者得
隨地休息乃比之於棠陰策長於詩歌咿哦不輟

舊志

陸舜臣字師臯橫州人廣州教授嘉鯉子也正德

丙子舉鄉魁除德慶州牧旋轉雷州司馬罷官歸

以著述為事曾輯橫州志雖未及梓文獻有徵

舊志

唐元殊字同卿臨桂人父淳為汀州司馬元殊甫
九歲過太守署觀牡丹索筆為賦語甚工正德丙

子年十四舉鄉試第一性任達好飲酒酣授之以
筆雲飛泉湧若有神助時里中任唐以詩自負見
元殊作輒歎服然元殊亦亟稱唐以為雅健不可

及云

節孫志

張烜宜山人弱冠舉正德己卯鄉薦授溧陽教諭
甚得士心調松之華亭以詩文為孫宗伯承恩徐
太史階所推重嘉靖己丑登進士歷官四十餘年

懋績日著所著有吉山漫集

舊志

張騰霄字子紳臨桂人於書無所不窺尤潛心於
易嘉靖壬午以易魁其鄉授鄧州學正講心性之
學先德行而後文章士皆有所造就譽望日盛忌
者讒之遂挂冠歸里集邑中才俊開帳講易自故
相呂文簡而下咸北面稱弟子暇則與諸公尋幽
選勝意有所得輒披襟舉杓行吟而歸於詩則力
追三唐書法尤得二王筆意所著有古穰漫稿楚

客吟草等集

縣志

李文鳳字廷儀宜山人嘉靖乙酉省解壬辰進士
歷官雲南僉事以疾歸文鳳簡亮自任不藉聲當
世博識書傳更勤咨訪從入京師及乘傳所至載
筆自隨一有所得輒欣然錄記歸而輯次成書曰

月山叢譚

舊志

李廣圃懷集人少好學工詞章舉嘉靖戊午孝廉
任普寧令廉介褻躬治尚慈惠以禮樂化民時與
士子講論詩書人稱文學之吏

府志

尹志蒼悟人性廉靜博學能文工篆隸嘉靖己卯
登賢書屢試春官不第選授縣令不就歸著書有

三吳雜記吳越遊草行世

縣志

謝啓翰字屏南全州人萬厯戊午登賢書授永康
令治尚廉平以潔清自守簿書之暇雅好經籍手
執一編常至夜分不倦歸裝別無長物惟圖書數
笈而已居鄉恂恂謹厚後進咸遵法之

舊志

莫魯字省菴懷集人以選貢授肇慶司訓旋轉雷

州教授師道端嚴訓課有法博綜今古尤長於詩

有刻集行世後遭兵亂散失今惟存邑乘數篇

縣志

蕭雲舉字允升宣化人年十九薦於鄉登萬歷丙

戌進士選翰林歷官吏部左侍郎主會試拔韓敬

等三百人晉禮部尚書平生氣節文章有過人者

廢子四人卒贈太子太傅謚文端諭祭葬祀鄉賢

所著書有青羅集行世

舊志

黃養正字童聖臨桂人少有名諸生膺歲貢司訓

馬平課士有法薦除柳州教授復以才堪民社薦擢東安令因母老乞歸終養既丁艱服闋不補講學伏波山堂桂人士多出其門性謙厚以禮自持所著有多口箴學者奉之為座右銘

縣志

唐之夔字贊一鬱林人萬厯丁酉解元甲辰進士選翰林院庶吉士尋改湖廣監察御史文學著稱言事亢直萬厯四十六年舉祀鄉賢

舊志

馬鏊全州人學務博覽工於詩少無宦情以嘯歌

寄意飭躬厲行卓有風裁訓二子仲芳叔芳先後

掇科第鄉黨重之

舊志

李叢字德馨蒼梧人以歲薦司訓雒容秩滿貧不能赴部歸擁臯比引掖後進環堵蕭然輒嘯歌自得年高德幼守令咸敬禮之卒年八十有五

府志

國朝

袁啟翼平樂人居昭平銅鼓峽閉戶讀書著隱居志恒言五卷詩論序記二卷葩經約旨歌一卷教

子景星康熙甲辰進士官翰林院提督四譯館太

常少卿贈啟翼如其官

府志參
舊志

廣西通志卷八十四